

၂ ပေတရု ပေတရုဟုနေ ဒုတိယပေးစာ နိဒါန်း

ပေတရုဟုနေ ဒုတိယပေးစာ ဟာ တမန်တော် ပေတရု ရေးဟူးဟယ် ဆိုဘီး ဖော်ပြဟူးဘေမဲ့ အယ်နေခေတ် ကျမ်းစာပညာရှင်လေဟာ လတ်ခံဂေဟု။ အယ်ပေးစာဟို့ တခြားတယော့-က်ဟုနေ ပေတရုကိုယ်စား ရေးပေးဟူး ဇာ ဖြစ်နိုင်ဟယ်။ စာရေးသူဟု ယေရှုရဲ့ သတ်ရှင်ရှင်းန ပေါင်သဏ္ဌာန် ပုလောန်းလဲရှင်းဟို့ မြင်ရဟူ သတ်သေဖြ စ်ဟယ် ဆိုဘီး ပြောဟူးဟယ် (၁.၁၇-၁၈)။ ပေတရုဟာ အယ်ပေးစာဟို့ ရေးဟူးမယ် ဆိုဟာ ခရစ်တော် မွီးဘီး န ၆၅-၆၉ ခုနှစ်ကြား သူသေခန် ရောမမြို့မာ ရေးဟူး ဇာ ဖြစ်နိုင်ဟယ်။ ပထမပေးစာရေးဘီးန ဒုတိယပေးစာဟို့ ရေးဟယ် ဆိုဘီး ဖော်ပြဟူးဟယ် (၃.၁)။ သူဟာ အယ် ပေးစာဟို့ ခရစ်ယာန်လေ ဂူလောင်းနားဟို့ လိစာတပ်ဟူး ဟယ်။

ပေတရုဟာ အယ်ပေးစာထဲမာ ယောင်ကြည့်သူလေဟို့ ကောင်းဟူ ပေါင်သတ်သေန သတ်ရှင်ဟို့တွပ် အားပေး ဟူးဘီး ဆရာတုယောန်လေရဲ့ နှော့က်ဟို့ လိုက်ဘဲနေ အေနံ ဒိပေးဟူးဟယ် (၂)။ ယေရှုပုလန်ကြွလာဟို့တွပ် ရရာတိုင်း ခံကြာဟယ် ဆိုဘီး ပြောနေဂေဟူ လူလေဟို့

လျစ်လျူရှုဟို့လည်း အားပေးဟွားဟယ်။ လူတိုင်း ကယ်
တန်ခံရဟို့တွပ် ဘုရားသခင်ဟာ ခီဆွဲနေရှင်း ဖြစ်ဟယ်
ဆိုဘီး ထော့-က်ပြဟွားဟယ် (၃.၈-၉)။ အယ်ကြောန်း
ကြောန့် ကောန်းဟူ ပေါင်သတ်သေန သတ်ရှင်ဟို့ ဖြစ်ဟု
ယ် (၃.၁၄)။

ကြောန်းရာ ကျဉ်းချောက်

၁။ ပေတရုဟာ သူ့ကိုယ်သူ မိတ်ဆစ်ဟွားဘီး သူ့ရဲ့ စာ
ဖတ်မားနားဟို့ ရေးဟွားဟူကြောန်း (၁.၁-၂)

၂။ ဘုရားသခင်ဟာ တတ်နိုင်တော်မူဟူကြောန့် ကောန်း
ဟူ ပေါင်သတ်သေန သတ်ရှင်ဟို့ ဒီပေးဟွားဟူကြော
န်း (၁.၃-၂၁)

၃။ ဆရာတုယောန်လေရဲ့ နော့-က်ဟို့ လိုက်ဘဲနေအော
န် ဒီပေးဟွားဘီး ဆရာတုယောန်လေဟို့ နော့-က်
ဆောင်းမာ ဖြားမျိုးဖြစ်လေ့မယ် ဆိုဘီး ပြောဟွား
ဟူကြောန်း (၂.၁-၂၂)

၄။ ပေတရုဟာ ယေရှုဒုတိယခါ ပုလန်ကြွလာမယ် ဖြ
စ်ဟူကြောန့် ကောန်းဟူ ပေါင်သတ်သေန သတ်ရှင်
ဘီး ပြင်ဆင်ဟို့ ယောင်ကြည်သူလေဟို့ အားပေးရှင်း
အားဖြင့် နီဂေါင်းချောက်ဟွားဟူကြောန်း (၃.၁-၁၇)

¹ ယေရှုခရစ်တော်ရဲ့ စေခံန တမန်တော်ဖြစ်ဟူ ငါ ရှိ
မုန်ပေတရုဟာ —

နို့လေရဲ့ ဘုရားသခင်န ကယ်တန်ရှင် ဖြစ်တော်မူဟူ
ယေရှုခရစ်ရဲ့ ပြောန့်မတ်ရှင်း တရားဟို့ နို့လေယောင်

ကြည်ဟူမျိုး ဖိုးကီးဟူ ယောင်ကြည်ရှင်းဟို့ ရရှိဂေဟူ သူလေးနားဟို့ စာရေးလိုက်ပါဟယ်။

² နို့လေရဲ့ ဖ ဖြစ်ဟူ ဘုရားသခင်န သခင်ယေရှုဟို့ သိ ဟူညဏ်အားဖြင့် ကျေးဇူးတော်န ငြိသတ်ရှင်းဟာ နန်း နို့လေမာ တိုးပွားဂေပါစေ။

ဘုရားသခင်ဟု ဝီးကော့-က်တော်မူဟူကြောင်း

³ နို့လေဟို့ သူရဲ့ ဖောင်းသရေတော်န ကောင်းမြတ်ရှင်း ထဲဟို့ ခေါ်ယူတော်မူဟူ သခင်ဟို့ နို့လေ သိရှင်းအားဖြင့် သတ်ရှင်မူနတူးဒ ဘုရားဝတ်န မွေ့လျော်ရှင်းအားဖြင့် စပ် ဆိုင်ဟူရာလေ ဂူလောင်းဟို့ ကိုယ်တော်နှိုက်ရှိဟူ ဘုရား ရဲ့ ဖောင်းတဂိုးတော်အားဖြင့် ပေးသနားတော်မူဘိ။*

⁴ အယ်မျိုးအားဖြင့် ရရာတိုင်း ကောင်းမြတ်ဘီး ဖိုးကီး ဟူ ဂဒိတော်လေဟို့ နို့လေဟို့ အပ်ပေးတော်မူဘိ။ ဖြားဖြစ် ကြောန့်နူးဆိုဟာ အယ်ဂဒိတော်လေဟို့ မှီပြုဘီး နန်းနို့လေ ဟာ လောကီတပ်မတ်မူလေ၊ ညစ်ကြေးလေန လွတ်ကင်း ဘီးဟာ ဘုရားပကတိဟို့ ဆစ်ဆံရဟူသူလေ ဖြစ်ဂေဟို့ တွပ် ဖြစ်ဟယ်။

⁵ အယ်ကြောန့်နူးနန်းနို့လေဟာ ယောင်ကြည်ရှင်း နှိုက် ကောင်းမြတ်ရှင်းဟို့၊ ကောင်းမြတ်ရှင်းနှိုက် ပညာ ဟို့၊

* **1:3 ၁.၃** ဖောင်းတဂိုးတော်အားဖြင့် ပေးသနားတော်မူဘိ၊ တချို့ မူရင်းလတ်ရေးမူလေမာ သူအားဖြင့်၊ ဆိုဘီး ရှိဟယ်။

⁶ ပညာရှိက ကာမဂေါင် ချောက်တီးရှင်းဟို့၊ ကာမဂေါင် ချောက်တီးရှင်းရှိက သီးခံရှင်းဟို့၊ သီးခံရှင်းရှိက ဘုရားဝတ်ရှိက မွေ့လျော်ရှင်းဟို့၊

⁷ ဘုရားဝတ်မာ မွေ့လျော်ရှင်းရှိက ညီကိုစောင်မတ်ရှင်းဟို့၊ ညီကိုစောင်မတ်ရှင်းရှိက ရှစ်ရှင်းမြစ်တာလေဟို့ စွမ်းကူကြိုးစားဘီး ထပ်ဆစ်ဂေ့ပါ။

⁸ ဖြားဖြစ်ကြောန်နူးဆိုဟာ အယ်ပါရမီလေဟာ နန်းနို့လေမာရှိဘီး တိုးပွားနေဟယ် ဆိုဟာ နန်းနို့လေဟာ နို့လေရဲ့ သခင် ယေရှုခရစ်ဟို့ သိကျွမ်းရှင်းရှိက ပျင်းဘဲနေဟို့တွပ်ရော၊ ကျိုးမွှောဘဲဇာလေ ဖြစ်ဘဲနေဟို့တွပ်ရော ပြုပြင်တတ်ဂေ့ဟယ်။

⁹ အယ်ပါရမီ မွှောဘဲဟူ သူလေဟာ မျစ်စိကန်းဟူသူ၊ မျစ်စိမှုန်ဟူသူ ဖြစ်ဟယ်။ ကိုယ့်ပြစ်ဟောင်း ဆေးကြောခံရကြောန်းဟို့ မေ့နေဂေ့ဟယ်။

¹⁰ အယ်ကြောန် ညီကို မောန်နှမလေ နန်းနို့ခံရဟူ ခေါ်တော်မူရှင်းန ဝီးကော့-က်တော်မူရှင်းဟို့ တည်မြဲစေဟို့တွပ် ပိုဘီး ကြိုးစားအားထုဂေ့ပါ။ အယ်မျိုးပြုနေမယ်ဆိုဟာ ထိမိဘီးလဲဇာန မြဲဒမ်း ကင်းလွတ်လေ့မယ်။†

¹¹ နော့-က်ဘီး နို့လေဟို့ ကယ်တန်တော်မူဟူ သခင်ယေရှုခရစ်ရဲ့ ထာဝရ နိုင်ငံတော်ထဲဟို့ ဝမ်စားဟူခွမ်ဟို့ နန်းနို့လေဟို့ ကြွယ်ဝအောန် ပေးသနားတော် မူလေ့မယ်။

† 1:10 ၁.၁၀ ထိမိဘီးလဲဇာန မြဲဒမ်း ကင်းလွတ်လေ့မယ်၊ အယ်မျိုးမွှောဘဲနေဟာ ပြစ်ထဲဟို့ ကွဲရော့-က်လေ့မယ်။

12 အယ်ကြောန့် ခုဟောပြောဟူ သမ္မာတရားဟို့ နန်းနို့လေ နားလည်ဘီး တည်ကြည်မှု ရှိဂေဟူလည်းဘဲ အယ်မျိုးစကားလေန နန်းနို့လေဟို့ မြဲဒမ်း ဒီပေးနှိုးဆော်ဟို့ တွပ် ငါမေ့လျော့ဟူ။

13 အယ်ခန္ဓာတဲမာ ငါရှိနေဟူမျှ ကာလပတ်လောင်း အယ်ကြောန်းရာလေဟို့ နန်းနို့ဟို့ ဒီပေးနှိုးဆော်သင့်ဟယ် ဆိုဘီး ငါတကယ်ဘဲ မှတ်ယူဟားပါဟယ်။

14 ဖြားဖြစ်ကြောန်းနူးဆိုဟာ နို့လေရဲ့ သခင် ယေရှုခရစ်တော်ဟာ ငါ့ဟို့ ဖော်ပြတော်မူဟူတိုင်း ငါ့ရဲ့ ခန္ဓာတဲဟို့ ကြာခန်မာ စွန့်ပယ်ရမယ် ဆိုဇာဟို့ ငါသိဟယ်။

15 အယ်မျိုးဖြစ်ကြောန့် ငါဟာ အယ်လောကဟုနေ ထွပ်ဟားဘီးန နန်းနို့လေဟာ အယ်ကြောန်းရာလေဟို့ မြဲဒမ်း မှတ်မိနေဟို့တွပ် ငါကြိုးစားမယ်။

ခရစ်တော်ရဲ့ ဖောင်းသရေတော်ဟို့ ကိုယ်တိုင်မြင်ဖူးဟူ သူလေကြောန်း

16 နို့လေရဲ့သခင် ယေရှုခရစ် တဂိုးတော်န ကြွလာတော်မူမယ် ဆိုဇာဟို့ နန်းနို့ဟို့ ဖော်ပြရာမာ နို့လေဟာ ပရိယာယ်န တီထွင်ဟားဟူ ဒဏ္ဍာရီ ပေါင်ပြင်လေဟို့ ပြောနေဂေရှင်း မူဟူ။ နို့လေဟာ ကိုယ်တော်ရဲ့ ဖောင်းသရေတော်ဟို့ ကိုယ်တိုင် မြင်ဖူးဟူသူလေ ဖြစ်ဂေဟယ်။

17 ဖြားဖြစ်ကြောန်းနူးဆိုဟာ “အယ်သူဟာ ငါမြတ်နိုးဟူ ငါ့ရဲ့ ရှစ်သား ဖြစ်ဟယ်” ဆိုဟူ သံတော်ဟာ ထူးမြတ်ဟူ

ရော့ခ်တော်ထဲဟု အယ်သခင်နားဟို့ ရော့-က်လာဟူ ခီမာ ဖ ဘုရားသခင်နားဟု ဂေါင်တော်န ဖောင်းသရေတော်ဟို့ ကိုယ်တော်ဟု ခံရတော်မူဟယ်။

¹⁸ အယ်ခီမာ နို့လေ ကိုယ်တိုင်ဘဲ သန်ရှင်းဟူ တောန် ထတ်မာ ကိုယ်တော်နတူးဒု ရှိနေဟူခီ ကောင်းဂန်ဟုနေ ရော့-က်လာဟူ အယ်သံတော်ဟို့ ကြားရဂေဟယ်။

¹⁹ နော့-က်ဘီး ပိုဘီး ခိုင်လောင်ဟူ ပရောဖက်လေရဲ့ စကားဟု နို့လေမာရှိဟယ်။ နန်းနို့လေရဲ့ စိန်လောင်းထဲ မာ အာရောင်တတ်ဘီး ကြယ်နီပေါ်ထွပ်ဟူ ကာလထိအော န် အယ်စကားတော်ဟို့ မှော်မိုက်ဟူ နေရာမာ ထွန်းလန်း ဟူ ဆီမီးဟူမျိုး ထန်မှတ်ဘီး မှီပြုသင့်ပါဟယ်။

²⁰ ကျမ်းစာမာပါဟူ ပရောဖတ်ပြု ဟောပြောချစ်လေ ဟု ကိုယ့်ဖာသာ နတ်မိပါယ်ပေါ်ဘဲဟူ ကြောန်းဟို့ ရင် ဦးဆောင်း သိမှတ်ဂေပါ။

²¹ ဖြားဖြစ်ကြောန်းနူးဆိုဟု ပရောဖတ်ပြု ဟောပြော ချစ်လေဟု ဖယ်ခါမှ လူရဲ့ လိုဆန္ဒအားဖြင့် ဖြစ်ပေါ်လာ ရှင်း မူဟု။ ဘုရားသခင်ရဲ့ သန်ရှင်းဟူ သူလေဟု သန် ရှင်းဟူဝိညာဉ်တော်ရဲ့ တိုက်တွန်းတော်မူရှင်းဟို့ ခံရဟူ ကြောန် ဟောပြောဂေရှင်း ဖြစ်ဟယ်။

2

ဆရာတုယောန်လေကြောန်း

¹ အယ်ဘေမဲ့ ပရောဖက် တုယောန်လေဟု ယုဒလူမျိုး လေထဲမာ ပေါ်လာဂေဟူမျိုး နန်းနို့လေထဲမာလည်း ပရော

ဖက် တုယောန်လေ ပေါ်လာဂေ့လေ့မယ်။ အယ်သူလေဟာ ပျစ်စီးရှင်းဟို့ ရော့-က်စေမယ့် မှားယွင်းဟူ ယူဝါဒလေဟို့ ခိုးခိုးဝှပ်ဝှပ်န ယူဆောန်လာဂေ့ဘီး ကိုယ့်ဟို့ ဖိုးခန ဝီးဝယ် တော်မူဟူ သခင်ဟို့ ပစ်ပယ်ဘီး ကိုယ့်ထတ်ဟို့ ရရာတိုင်း ဖြန်ဟူ ပျစ်စီးမှုဟို့ ရော့-က်စေဟူ ပရောဖက် တုယောန် လေဟာ နန်းနို့လေမာ ရှိဂေ့လေ့မယ်။

² ရရာတိုင်းများဟူ လူလေလည်း သူးနို့လေရဲ့ ညစ် ညူးဟူ ကောန်းဘဲဟူ ကျင့်ဓလေ့နော့-က်ဟို့ လိုက်ပါရှင်း အားဖြင့် သမ္မာတရားလမ်း အသရေဟာ ပျစ်စီးလေ့မယ်။

³ သူးနို့လေဟာ လောဘစိန် ချော့မော့ဟူ စကားလေဟို့ ပြောဘီး နန်းနို့လေဟို့ မှလတ်ထုလေ့မယ်။ ရှေးကာလဟု နေဘီး သူးနို့ဟို့ ပြစ်ဒန်စီရင်မယ့် သခင်ဟာ ဆင်သင့်ရှိနေ တော်မူဟယ်။ သူးနို့ဟို့ သုတ်သင်ဖျစ်ဆီးမယ့် သခင်ဟာ အိဝိုက်တော်မူဟူ။

⁴ ဖြားဖြစ်ကြောန့်နူးဆိုဟာ ဘုရားသခင်ဟာ ပြစ်မှားဟူ ကောန်းဂန်တမန်လေဟို့ ပြောဘဲန ငရဲထဲမာ ထီးသီးဟွား ဘီး တရားစီရင်ဟို့တွပ် မှောန်မိုက်ထဲမာ သံကြိုးန ခယ် ဟွားတော်မူလေဟယ်။*

⁵ ရှေးလောကဓာတ်ဟို့လည်း ပြောတော်မူဟူ။ ဖြောန့် မတ်ရှင်းတရားဟို့ ဟောဟူ နောနေ လူခွန်နစ်ယော့-က် ဟို့ ကယ်တန်တော် မူ ဘီး ဘုရားဟို့ ကိုးကွယ် ဘဲ ဟူ

* 2:4 ၂.၄ မှောန်မိုက်ထဲမာ သံကြိုးန ခယ်ဟွားတော်မူလေဟယ်၊ တချို့ မူရင်းလတ်ရေးမူလေမာ မှောန်မိုက်တွမ်းလေထဲမာ၊ ဆိုဘီး ရှိဟယ်။

လောကီသား ဂူလောင်းဟို့ ရေလွှမ်းမိုးစေတော်မူဟယ်။

⁶ သောဒုံန ဂေါမောရမြို့ဟို့ ပြစ်ဒန်စီရင်တော်မူဘီး မီးလောန်စေရှင်းအားဖြင့် နှော-က်တခီမာ တရားဘဲဟူကျင့်ဟို့ ကျင့်ဟူ သူလေတွပ် ပေါင်သတ်သေဟို့ ထားတော်မူလေဟယ်။

⁷ အယ်ခီမာ တရားဘဲဟူ သူလေရဲ့ ညှစ်ညှူးဟူ ကျင့်အားဖြင့် စိနှော-က်ယှစ်ခံရဟူသူ ဖြောန်မတ်ဟူ လောတဟို့ ကယ်နှုတ်တော်မူဟယ်။

⁸ အယ်ဖြောန်မတ်ဟူသူဟာ တရားဘဲဟူ သူလေနတူးဒူနေရဟူ ခီမာ သူးနို့လေရဲ့ အဓမ္မမှုရာလေဟို့ မြင်ရကြားရဟူကြောန့် သူရဲ့ ဖြောန်မတ်ဟူ စိဝိညာဉ်မာ ရရာတိုင်းညှဉ်းဆဲခံရလေဟယ်။

⁹ အယ်ကြောန့် ဘုရားဝတ်မာ မွေ့လျော်ဟူသူလေဟို့ စောင်ဇမ်း နှော-က်ယှစ်မှုထဲဟု ကယ်နှုတ်တုံတုံန တရားဘဲဟူ သူလေဟို့ တရားစီရင်ဟူ နေရစ်မာ ပြစ်ဒန်ခံစေဟို့ ချောက်နှောင်ဟူးဟို့တွပ် ဘုရားသခင် တတ်နိုင်တော်မူလေဟယ်။

¹⁰ ထူးသဖြင့် ညှစ်ညှူးဟူ တတ်မတ်မှုအားဖြင့် သွီးသားဇာတိ နှော-က်ဟို့ လိုက်ဘီး အာဏာစစ်ဟို့ ထိမဲ့မြင်ပြုဟူ သူလေဟို့ အယ်မျိုဉ်း ချောက်ဟူးတော်မူလေ့မယ်။

အယ်သူလေဟာ တင့်ရဲဟူသူ မာန်မာနထောန်လွှားဟူ သူလေဖြစ်ဘီး ကြော-က်ရွံ့မှုမွေ့ဘဲ ဖောင်းတဂိုးကီးဟူ သူလေဟို့ ကဲ့ရဲ့စော်ကားတတ်လေဟယ်။

11 ကောင်းဂန်တမန်လေဟာ သူးနှိလေထတ် ခွန်အား တဂိုးကီးဟူလည်းဘဲ ဘုရားသခင် ရှေ့တော်မာ သူးနှိလေဟိုကဲ့ရဲ့ပြစ်တန်ဘီး စီရင်ရှင်းဟို့ ပြုဂေဟု။

12 သူးနှိလေဟာ ဖမ်းဆီးဖျစ်ဆီးဟို့တွပ် ပေါ့-က်ဖွားလာဟူ၊ သိပညာမဲ့ဘီး ဆင်ခြင်တုံတရား မှော့ဘဲဟူ လိဆန်လေမျိုး ဖြစ်ဂေဘီး ကိုယ်နားလည်ဘဲဟူ ဇာလေဟို့ ကဲ့ရဲ့ဘီး ပြောဆိုတတ်ဂေဟယ်။ သူးနှိလေဟာ သိဉာဏ်မှော့ဘဲဟူ လိဆန်လေ ပျစ်စီးဟူမျိုး ပျစ်စီးရဂေလေ့မယ်။

13 တရားဘဲဟူဇာရဲ့ ဖိုးခနေန တရားဘဲဟူ ပြုရှင်းဟို့ခံရဂေလေ့မယ်။ သူးနှိလေဟာ နေ့ဖတ်မာ သော့-က်စားယစ်မောရှင်းလေဟို့ ပျော်ရွှင်ရှင်း ဖြစ်ဟယ် ဆိုဘီး ထန်မှတ်ဂေတတ်ဟယ်။ နန်းနှိနတူးဒု စားသော့-က်ဟူ ခီမာကိုယ့်ရဲ့ မှားယွင်းဟူ သဘောန မွေ့လျော်ဂေဘီး နန်းနှိလေမာ ညစ်ကြေးစွန်းကွက်ဟူမျိုး ဖြစ်ဂေဟယ်။

14 သူးနှိဟာ ဖော့-က်ပုလန်ဟူ ကိလေသာန ပုလဲဝဟူ မျစ်စိကြောန့် ဒုစရိုက်ဟို့ ပြုဘဲနေနိုင်ဂေဟု။ သူးနှိလေဟာ တည်ကြည်မှု စိန်လောင်းမှော့ဘဲဟူ သူလေဟို့ ပြစ်ထဲဟို့ သွီးဆောန်တတ်ဂေဟယ်။ လောဘလွန်ကြူးမှုမာ ကျင်လည်ဘီး ကီရှင်းခံရဟူ သားမီးလေဖြစ်ဂေဟယ်။

15 သူးနှိလေဟာ ဖြောန့်မတ်ဟူလမ်းဟု ထွပ်ဟူကြောန့် လမ်းလွဲဟွားဘီး တရားဘဲဟူ နည်းလမ်းအားဖြင့် ရဟွားဟူ ဖိုးခဟို့ နှစ်သက်ဟူ ဗောသော်ရဲ့သား ဗာလမ်ရဲ့ လမ်းစဉ်ဟို့ လိုက်ဂေဟယ်။

16 အယ်ဘေမဲ့ ဗာလမ်ဟာ တရားဘဲနရဟူခဟို့ တတ်မတ်ဟူကြောန့် ကိုယ်ပြုဟူ ဒုစရိုက်အားဖြင့် ဆောင်းမရှင်းဟို့ ခံရဟယ်။ ဖြားဖြစ်ကြောန့်နူးဆိုဟာ မြည်းဟာ လူ့ဘာသာအားဖြင့် စကားပြောဘီး အယ်ပရောဖက်ရဲ့ မိုက်မဲမှုဟို့ တားမြစ်လေဟယ်။

17 အယ်သူလေဟာ ရေမှောဘဲဟူ ရေတွမ်းမျိုး၊ လေတိုက်ဟူကြောန့် လွှဲမိပါဟားဟူ မိုးတီမျိုး ဖြစ်ဂေဟယ်။ သူးနို့လေတွပ် ထာဝရမှောန်မိုက်ဟို့ သိုဟားလေဟယ်။

18 ဖြားဖြစ်ကြောန့်နူးဆိုဟာ သူးနို့လေဟာ မှားယွင်းမှုထဲမာ ကျင်လည်ဂေဟူ သူလေထဲဟု လွတ်မြော-က်ခါဇရိုဟူ သူလေဟို့ ဝါကြားဟူ ချည်းနှီးစကားလေဟို့ သောင်းဘီး သွီးသားဇာတိတတ်မတ်ရှင်း၊ ကာမဂေါင် လိုက်စားရှင်းအားဖြင့် ပြစ်ထဲဟို့ သွီးဆောန်တတ်ဂေဟယ်။

19 သူးနို့လေဟာ လွတ်ရှင်းခွမ်ရှိဟယ် ဆိုဘီး ဝန်ခံရဲ့န ကိုယ်ကိုယ်တိုင် ပျစ်စီးမှုရဲ့ ကျေးကျွန်လေ ဖြစ်ဂေဟယ်။ ဖြားဖြစ်ကြောန့်နူးဆိုဟာ လူဟို့ နိုင်ဟူဇာဟာ လူရဲ့သခင် ဖြစ်ဟယ်။

20 နို့လေရဲ့ သခင်န ကယ်တန်ရှင်ဖြစ်ဟူ ယေရှုခရစ်ဟို့ သိကျွမ်းရှင်းအားဖြင့် လောကီညစ်ညူးမှုနု လွတ်ကင်းဘီး မှ နှော့-က်ထပ်တခါ ထောန်ချော့-က်မိဘီး ရှောင်းဟယ် ဆိုဟာ နှော့-က်ဖြစ်ဟူဇာဟာ ရှေ့ဖြစ်ဟူ ဇာထတ် ပိုဘီး ဆိုးလေဟယ်။

21 ဖြားဖြစ်ကြောန့်နူးဆိုဟာ ဖြောန့်မတ်ဟူ လမ်းဟို့ သိ

ရဲ့န ကိုယ့်ဟို ပေးအပ်ဟူးဟူ သန့်ရှင်းဟူ ပညတ်တော်ဟို
စွန့်ပစ်ဟူထုတ် အယ်မူတရားလမ်းဟို သိဘဲနနေရဟူ
ဇာဟု ပိုဘီး ကောင်းဟယ်။

22 “ခွီးဟာ ကိုယ့်ရဲ့ အန်ဖတ်ဟို ပုလန်စားတတ်ဟယ်။
ရေချိုးပေးဟူးဟူ ဝပ်ဟာလည်း ဇီးဗုလစ်အိုင်မာ ပုလန်
ဘီး လူးတတ်ဟယ်” ဆိုဘီး ပြောဟူ မှန်ဟူ စကားပေါင်
ဟာ အယ်သူလေအားဖြင့် ပုလဲဇောင်လေဟယ်။

3

သခင်ဘုရားကြွလာတော်မူမယ့် ဂဒိတော်ကြောန်း

1 ရှစ်ရဟူသူလေ ခု အယ်စာဟို ဒုတိယကြိ ငါရေးဘီး
ပေးလိုက်ပါဟယ်။ ငါဟာ အယ်စာနေ့စောန်လောင်းမာ
နန်းနို့လေရဲ့ ဖုလူစင်ဟူ စိဝိညာဉ်လေဟို ဒိပေးနှိုးဆော်
ဟူးပါဟယ်။

2 သန့်ရှင်းဟူ ပရောဖက်လေဟာ ကြိုတန်ဘီး ပြောဟူး
ဟူ စကားလေန နန်းနို့ရဲ့ တမန်တော်လေဟုနေတဆင့် ပေး
အပ်ဟူးဟူ ကယ်တန်ရှင် သခင်ဘုရားရဲ့ ပညတ်တော်
လေဟို နန်းနို့လေ ပုလန်ဘီး ဒိရစေဟိုတွပ် ဖြစ်ဟယ်။

3 နန်းနို့လေ ရင်ဦးဆောင်း သိဟူးရဟိုချစ်မာ နှော-က်
ဆောင်းဟူကာလမာ ပြစ်ရယ်ပြုတတ်ဟူ လူလေဟာ
ကိုယ့်ရဲ့ တတ်မတ်မှုတိုင်း ကျင့်နေဘီး၊

4 “သခင်ဘုရား ကြွလာမယ်ဆိုဟူ ဂဒိတော်ဟာ ဖယ်မာ
ရှိဟိုကြောန်းနူး။ နို့ဘိုးဘေးလေ သေဟူးဘီးဟူ ခီဟုနေ

စဘီး ရှိမျှဂူလောင်းဟာ ဖန်းဆင်းစဟုတိုင်းဘဲ ဆစ်ဘီးရှိ နေဟယ်” ဆိုဘီး ပြောဆိုဂေလေ့မယ်။

⁵ ဖြားဖြစ်ကြောန်းနူးဆိုဟာ ဘုရားသခင်ဟာ ရှေးကာလ မာ ကောန်းဂန်န ရေထဲဟုထွပ်ဘီး ရေအားဖြင့်တည်ဟူ မှ လေဂီးဟို့ စကားတော်အားဖြင့် ဖန်ဆင်းဟူကြောန်းနု၊

⁶ ရှေးကမူဘာမှလေဂီးဟာ ရေလွှမ်းမိုးခံရဘီး ရေအား ဖြင့် ဖျစ်ဆီးခံရဟူကြောန်းဟို့ သူးနို့လေဟာ တမင် သတ်သတ် မေ့ဟားဂေဟယ်။

⁷ ခုရှိနေဟူ ကောန်းဂန်န မှလေဂီးဟာ အဓမ္မလူလေဟို့ တရားစီရင်ဘီး ဖျစ်ဆီးဟူ နေ့ရစ်ထိ အယ် စကားတော် အားဖြင့် သိုဟားဘီး မီးရှို့ဟို့တွပ် ထီးသီးဟားလေဟယ်။

⁸ အယ်ဘေမဲ့ ရှစ်ရဟူသူလေ၊ ဘုရားသခင်တွပ် နေ့ရစ် တရစ်ဟာ နှစ်တထောန်ဖြစ်ဟူမျိုး နှစ်တထောန်ဟာ နေ့ ရစ်တရစ်ဟူမျိုး ဖြစ်ဟယ် ဆိုဇာဟို့ မေ့ဂေန။

⁹ နှေးဟယ် ဆိုဘီး တချို့လူလေ ထန်မှတ်နေဘေမဲ့ ဘုရားသခင်ဟာ ဂဒိတော်ရာမာ နှေးတော်မူဟူ။ ဖယ်သူ လည်း ပျစ်စီးဘဲန လူတိုင်းနောန်ဒရဟို့တွပ် လိုတော်ရှိဟူ ကြောန်း နန်းနို့လေဟို့ သီးခံတော်မူလေဟယ်။

¹⁰ ခိုးဟာ ညဉ့်ဖတ်မာလာတတ်ဟူမျိုး သခင်ဘုရားရဲ့ နေ့ရစ်ဟာ လာလေ့မယ်။ အယ်နေ့ရစ်မာ ကောန်းဂန်ဟာ

ရရာတိုင်း ကုလသံသယတို့ ပျော့-က်ဟားလေ့မယ်။*
 လောကဓာတ်လေဟာ ရရာတိုင်းပူအာကီးဟူကြောင့် ပျစ်
 စီးဟားလေ့မယ်။ မုလေဂီးဟုနေစဘီး မုလေဂီးထတ်မာရှိ
 ဟူဇာလေ ဂူလောင်းဟာ လောန်ကျွမ်းကူလေ့မယ်။

11 အယ်ဇာလေ ဂူလောင်းဟာ အယ်မျိုး ပျစ်စီးဟား
 မယ် ဖြစ်ဟူကြောင့် နန်းနီလေဟာ ဖယ်မျိုးဟူသူလေ ဖြစ်
 ဟို့သင့်ဟယ်နူး။ နန်းနီလေဟာ သန်ရှင်းဟူကျင့်ဟို့ ကျင့်
 ဘီး ဘုရားဝတ်န မွေ့လျော်ရှင်းအားဖြင့်

12 ဘုရားသခင်ရဲ့ နေရစ်ဟို့ စောန့်မျှော်ဘီး အယ်နေရစ်
 ဖြန်းဖြန်းရော-က်လာဟို့ မျှော်လင့်သင့်ဟယ်။ အယ်နေ
 မာ ကောန်းဂန်ဟာ မီးလောန်ကျွမ်းဘီး ပျစ်စီးဟားလေ့
 မယ်။ လောကဓာတ်လေလည်း ရရာတိုင်း ပြင်းထန်ဟူ ပူ
 ရှိအားဖြင့် ရယ်ပျော်ဟားဂေ့လေ့မယ်။

13 အယ်ဘေမဲ့ နီလေဟာ ဘုရားသခင် ဂဒိထားတော်
 မူဟူ ဖြောင့်မတ်ရှင်းတရားရဲ့ တည်ဟူနေရာ ကောန်းဂန်
 သစ်န မုလေဂီးသစ်ဟို့ စောန့်မျှော်နေဂေ့ဟယ်။

14 အယ်မျိုးဖြစ်ကြောင့် ရှစ်ရဟူသူလေ၊ အယ်နေရစ်ဟို့
 စောန့်မျှော်နေဂေ့ဟူကြောင့် ပြစ်ကင်းဘီး ဖြားစွန်းထင်းလ
 ည်းမွေ့ဘဲဟူ သူဖြစ်န ကိုယ်တော်ရဲ့ ရှေ့တော်ဟို့ ငြီးငြိပ်
 ဝပ် ရော-က်နိုင်ဟို့တွပ် ကြိုးစားအားထုဂေ့ပါ။

* 3:10 ၃.၁၀ ပျော့-က်ဟားလေ့မယ်၊ တချို့ မူရင်းလတ်ရေးမူလမာ
 ပါရှိဟယ်၊ တချို့လေမာလည်း မီးရှို့ခံရဟယ်၊ မူရင်းလတ်ရေးမူတခုမာ
 ဖျစ်ဆီးခံရဟယ် ဆိုဘီး တွဲရှိရဟယ်၊ ဆိုဘီး ပါရှိဟယ်။ 3:13 ၃.၁၃
 ဗျာ ၂၁.၁

15 နို့လေရှစ်ရဟူ ညီကိုပေါလုဟာ ဘုရားသခင်ပေးဟူ ဉာဏ်ပညာအားဖြင့် နန်းနို့လေဟို့ ရေးဘီးပေးလိုက်ဟူ တိုင်း နို့လေရဲ့ သခင်ဘုရား သီးခံတော်မူရှင်းဟာ နန်းနို့လေ ကယ်တန်ရှင်းခံရဟို့တွင် ခွမ်းရေးပေးရှင်း ဖြစ်ဟုယ် ဆိုဇာဟို့ မှတ်ယူဂေပါ။

16 သူဟာ အယ်ကြောန်းရာလေန ပတ်သတ်ဘီး စီရင်ရေးဟွားဟူ စာစောန်လေမာ နားလည်ရ ခတ်ခဲမှုလေ ရှိဟုယ်။ သိပညာမေ့ဘဲဟူ၊ တည်ကြည်မှုမေ့ဘဲဟူ သူလေဟာ အယ်စာစောန်ဟုနေစဘီး ကျန်ဟူ ကျမ်းစာလေရဲ့ နတ်မိပါယ်ဟို့ မော့-က်လှန်ဘီး ကိုယ့်ကိုယ်ကိုယ် ဖျစ်စီးတတ်ဂေဟုယ်။

17 အယ်ကြောန့် ရှစ်ရဟူသူလေ အယ်ကြောန်းရာလေဟို့ နန်းနို့သိဟွားပီးဘီ ဖြစ်ဟူကြောန့် တရားဘဲဟူသူလေရဲ့ ပရိယာယ်အားဖြင့် သွီးဆောန်ရှင်းနော့-က်ဟို့ လိုက်ပါဟွားဘီး နန်းနို့လေရဲ့ တည်ကြည်မှုဟို့ ဆောင်းရှောန်းဘဲနေဟို့တွင် ကိုယ့်ကိုယ်ကိုယ် စောန့်ရှော့က်ဂေပါ။

18 နို့လေရဲ့သခင်န ကယ်တန်ရှင် ဖြစ်တော်မူဟူ ယေရှုခရစ်တော်ရဲ့ ကျေးဇူးတော်နရော၊ ကိုယ်တော့်ဟို့ သိကျွမ်းဟူ ပညာနရော ကီးထွားဂေပါ။ အယ်သခင်ဟာ ခုဟုနေစဘီး ထာဝရ ကာလပတ်လောင်း ဖောင်းသရေတော်ရှိပါစေ! အာမင်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1